HARENGVE 18354

PRONONCEE

DEVANT LE ROY, SEANT EN SES ESTATS generaulxà Bloys, par Reuerend pere en Dieu, Messire Pierre En Re D'E Pinac, Archeuesque, Comte de Lyon, Primat des Gaules, au nom de l'Estat Ecclesiastique de France.




A PARIS,

Chez P. l'Huillier, rue S. Iaques, à l'Olivier.

I 5 7 7.

AVEC PRIVILEGE DV ROY.





ARENGVEPRO-

NONCEE DEVANT LE Roy, seant en ses Estats generaulx à Bloys, par Reverend pere en Dieu, Messire Pierre d'Epinac, Archeuesque, Comte de Lyon, Primat des Gaules, au nom de l'Estat Ecclesiastique de France.

> IRE, encores que la Frace, qui a esté iusques icy agitee par les plus grandes & perilleuses tépestes, qui ayent iamais tra-

uaillé autre Republique, ne soit pas

encores du tout hors des vagues & orages: si est-ce qu'elle pense desia voir de loin le port, & se persuade d'arriuer bien tost en lieu de seureté, puisque toutes choses luy tendent ayde & promettent secours. Car premierement Dieu qui auoit estendu fur nous la main de son iuste courroux, nous ostant le sentiment de nos maux, & le sens pour y pourueoir, semble maintenant nous regarder de son œil de pitié, puis qu'il nous prepare de si grands conseils, & vne si parfaicte vnió, pour arrester le cours commun de nos miseres. Et apres ceste asseurance que nous auons eu de Dieu, la prudéce qui est en vous plus grande que vostre aage ne permet, la dexterité de vostre esprit, qui se recognoist en toutes vos actions, & a esté remarquée en ceste eloquente proposition, qui a raui tout le monde en admiration, & vostresaincte & bonne volonté & pieté enuers vostre peuple, nous donnent esperance d'vne felicité prochaine. Et ceste expe-Etation est grandement confirmée, quand nous considerons que vostre sainct desir est si affectueusement secondé par le conseil de la Royne vostre mere, qui ayant si bien merité de tout le Royaume de France, tant pour le soin qu'elle a eu de faire si sainctement & religieusement instituer les ans de vostre premiere ieunesse, que par la sage conduite, par laquelle elle a manié le gouvernail de ceste Monarchie, pendant le temps des plus dageureuses tépestes, continue encores maintenat à vouloir par sa prudence s'ay der à remettre vostre Royaume en son ancien honneur. Et

A iij

nous promet encores beaucoup de bien l'adsistance & valeur de Monseigneur vostre frere, que nous esperons debuoir estre le bras dextre de vostre authorité & puissance. Et aucc toutes ces choses vos treshumbles subiects, qui par les calamitez souffertes par le passé, sembloyent auoir perdu le courage, recognoissans la faueur que le ciel leur presente maintenant, reueillet leurs esprits ja comme endormis & assoupis, & apportet vn bon zele & affection à la restauration de cest estat : de sorte qu'il semble que toutes ces choses ioinctes ensemble, nous facent desia veoir le ciel plusserain, & nous promettent vne heureuse tranquillité.

Et comment est-ce que nous ne serions tous en ceste expectation de bonheur, puis qu'il plaist a vostre

Majesté, nó comme Roy, mais comme pere tresbenin, traitter si gratieusementauec vos subiects, leur donner ceste honneste liberté de vous dire leurs plaintes & doleances, & faire vne si amiable communication & conference auec eulx, pour trouuer les moyens de leur donner quelque asseuré repos apres tant de malheurs? En quoy certes ils cognoissent combien est grande vostre sagesse & prouidence, qui a sceu tresbien recognoistre, que vous ne pouuiez rabiller les desordres qui estoient en vostre Royaume, que premierement vous ne les eussiez bien & amplemet entendus: & ne les pouuiez mieux entendre que par la bouche de vostre peuple, qui luy-mesmes en sent les pertes & les douleurs. Caràla veritél'vne des plus grades incommo-

ditez qui accopagnent l'estat Royal, est que le Prince ne peult entendre les dessaults qui sont en son estat, que par la bouche de ceux qui sont autour de leurs oreilles. Et iceulx luy estans bien souuent dissimulez il ne peult, bien qu'il en eust bonne volonté, les reparer, pour contenter son peuple. Chose qui despleut tellement à l'Empereur Diocletian, que voyant que ses Conseillers luy cachoient la verité des fautes qui estoient en son Empire, luy ostant par là tout moyen de les reigler, comme il en auoit bonne volonté: il se despita tellement, que pour ceste raison principale il remit & resina fon Empire entre les mains de Constantius Chorus: & aima mieux viure en personne priuée, & dresser son iardin à Solone, que de garder l'Empire

l'Empire du monde auec ceste incommodité, de ne pouuoir sidelement recognoistre les maulx ausquels il appartient à vn Empereur & Prince souuerain de pourueoir.

Mais vostre Majesté, SIRE, a bien prins vn conseil beaucoup plus honorable, vtil & salutaire: car appellant tout son peuple, qui asenty toutes ces calamitez & ruines, & leur donnant toute liberté de dire ce qui le greue, rien ne luy pourra estre caché. Et cognoissant particulierement quelles sont toutes les maladies qui affligent tous les membres de ceste Republique, il pourra aussi aueceux y trouuer des conuenables remedes. Et tout ainsi commeils recognoissent que vous exercez en leur endroict l'office, non seulement d'vn iuste & equitable Prince, mais encores d'vn bon & pitoyatoyable pere : ainsi ils ne doiuent desirer rien plus que de donner par effect tesmoignage de l'obeissance, à laquelle les oblige, & la nature qui les a fait naistre vos subiects, & l'amitié patérnelle qu'il vo⁹ plaist leur porter.

Et parce, SIRE, vos treshumbles & tres-obeissans seruiteurs & subiects; les gens Ecclesiastiques de vostreRoyaume, recognoissans que ceste vnion de l'obeissance du subiect, auec le commandement du Prince, est une liaison qui entretient en estre & en grandeur ce grand corps commun de la Republique, qui vient si tost à decheoir, que ce lien est dissolu & rompu, vous protestent deuant vostre Majesté, qu'ils n'ont rien de plus cher, ny n'ont apporté, apres l'honneur de Dieu, autre but & fin à

leurs actios & discours en ceste commune & publique assemblée, sinon que de tenter tous les moyens qui pourront estre pour rendre vostre Majesté aussi aimée & obeye de ses subjects, crainte & redoubtée deses ennemis, comme ont esté les Roys vos predecesseurs, & comme vos vertus le meritent. Car nous sçauons assez, & l'experience nous en a (malheureux que nous sommes) trop fait sentir le dommage, que la desobeissance est l'affoiblissement de toute puissance, la ruine des maisons & familles, la perte des villes, seigneuries, &Royaumes. Et si iamais la terre a porté des Geans, qui, comme a creu l'ancienneté fabuleuse, ont assailli les cieux, & conspiré contre la Majesté diuine : il semble bien que ce ayent esté ceux, qui rompans le lien

Bij

commun des loix par leur desobeissance & impieté, ont confondu, desordonné, & renuersé sans dessus dessoubs toutes choses.

Vostre Majesté donques, SIRE, acceptera maintenant, s'il luy plaist, ce public tesmoignage que nous vous donnons d'vne tres-humble obeissance & sidele seruitude, de laquelle nous pretendons ne nous departir iamais. Et puis qu'il vo° plaist, pour ouurir le chemin à vne bonne restauration de vostre estat, nous donner la liberté de remonstrer les choses qui nous greuent: nous estimerions faire grand tortau debuoir que nous auons à Dieu, à vostre seruice, au bié & vtilité de nostre patrie, à l'expectation de ceux qui nous ont enuoyez, & à ceste singuliere & bonne volonté que vous auez enuers

nous, si palliant les affaires nous vous dissimulions nos maulx, nos pertes, & nos calamitez. Car puis que par les loix ciuiles celuy est tenu coulpable de crime de leze Majesté, qui ayant entendu quelque entreprinse ou cospiration au dommage du Prince, ne la reuele, ne serions nous pas iustement reputez pour traistres, si estans appellez soubs l'auctorité de vostre Majesté pour luy declairer les causes du mal commun, nous vous cachions ou dissimulions la verité des choses qui meritent reglement? Et encores que le vieil Prouerbe nous soit assez cogneu, que le complaire acquiert des amis, & la verité apporte haine: si est-ce que nous estimons au contraire, que la verité soubstenue par l'auctorité de vostre Majesté, aura tant d'efficace, qu'elle

sera prinse en bonne part de chacun, puis qu'elle sera approuuée de vous. Aussi, Sire, seroit-ce chose qui seroit mal-seante à nous, & contraire à nostre vacation, si nous attachions (comme dit le Prophete) des oreilliers soubs les coudes de ceux qui faillent, & mettions des coussins & cheuets soubs la teste des pecheurs, pour seduire les ames & les entretenir en leur vice. Et puis que le patient ne peut estre bien guary s'il ne declaire bien apertemét les causes de son mal, nous vous descouurirons nos playes, nous dirons les symptomes qui nous arriuent, & ne celerons les douleurs que nous sentons, attendant en nostre mal, secours de vous, comme de nostre medecin souuerain. Et observerons toutesfois en ceste nostre liberté tout le respect que nous deuons à vostre Majesté, & la modestie que se doit attendre & esperer de tel-

les gens que nous sommes.

Il y a trois choses qui maintiennent l'estat de toutes les Republiques, & de l'exacte observation desquelles depend leur heur & felicité: comme au contraire leur corruption est vn presage euident & manifeste de leur prochaine ruine. La premiere est la religion, la seconde la police, tant ciuile que militaire: & la troissesme les finances publiques. Et par ce ayant traitté les poincts generaux qui appartiennent à ces trois, & remettat ce qui sera de particulier au cayer de nos remonstrances, il semblera que nous aurons jetté vn ferme fondemét-pour ce qui merite reformation en l'estat de ceste Monarchie, qui a esté desreiglée en tous ces ordres, par

la licence que le malheur du temps a apporté, soubs la longueur des intestines guerres & partialitez ciuiles.

L'ay mis la Religion en premier lieu, pour ce que le premier accord des peuples laissans la vie barbare & rustique pour s'assembler en la societé ciuile, a esté d'auoir vn lieu de religion, pour les contenir ensemble. Desorte que, comme dit Plutarque, si nous recherchons curieusement toutes les contrées du monde, & la memoire de toutes les anciennes & modernes Republiques, nous trouuerrons bien que quelques vnes se sont passées de Roys, les autres de loix, les autres de lettres, de murailles, de maisons & richesses, & ainsi de toutes autres choses, qui semblent estre necessaires à vne communauté politique:mais il ne s'en trouuerra iamais

mais aucune qui n'aye eu vne certaine religion pour honnorer Dieu. Et seroit, dit-il, plus aisé de bastir vne ville sans fons ou sans terre, que d'assembler vn peuple sans religion. Et pource voyons nous, que tous les anciens legislateurs; encores qu'ils fussent Idolatres, ont commencé leurs institutions & ordonnances par vn tel quel honeur de Dieu, & ceremonie exterieure de la religion: comme Deucalion aux Grecs, Lycurgue aux Lacedemoniens, Yon & Solonaux Atheniens, Romulus & Numa, aux Romains. Et brief en toutes les Seigneuries du monde, le premier fondement de l'estat de la societé ciuile, a esté vne religion inuiolablement obseruée. Et de là viet que tous ceux qui se sont messez du maniement des affaires publics, n'ont iamais rien tant

craint, qu'vn desordre en leur religio, ou quesque nouveauté en icelle. Cognoissant bien que la religion (qui est celle qui retient la societé publique, & est le fondement de toutes les loix) ne pouuoit estre troublée ou changée, que par vne sinistre consequence, elle n'apportast vn grand changement & redoutable perturbation en tout l'estat. Et non sans cause ce grand Orateur Romain disoit, qu'estant la religion alterée, il s'en ensuyuoit necessairement la perte de la fidelité entre les hommes, & vne confusion desordonnée de la vie ciuile. Dequoy nous trouuerrons assez d'exemples en toutes les Republiques bien instituées. Et si nous voulons rechercher combien les Atheniens, qui ont esté celebres entre tous les autres Grecs,

pour leur sage gouuernement, ont eu chere la conseruation de leur religion, le seul exemple de Socrates nous fera veoir en quel horreur ils auoient l'introduction d'vne nouuelle religion. Car ses ennemis, qui ne cherchoient sinon que calomnieusement le faire mourir, ne peurent trouuer vn crime plus detestable, ny par lequel ils le peussent rendre plus odieux, que l'accusant qu'il introduisoit vneautre religion, que celle que les Atheniens auoient de tout temps obseruée. Comme aussi nous voyons que Xenophon & Platon, defendans sa cause, se sont plus arrestez à le purger de ceste accusation, que de nulle aultre, qui luy fut imposée. Et Isocrates, Orateur renommé entre les Grecs, escriuant

THE WALL OF THE

l'institution d'vn Prince, l'exhorte de ne changer la religion de ses predecesseurs, pour les troubles & remucmens qui en peuuent aduenir. Et dés le premier establissement de la Republique Romaine, entre les premieres loix de Romulus, ceste icy en estoit vne, Deos peregrinos ne colunto. Et Numa second Roy, voulant reigler la religion des Romains, crea des Pontifes, affin, comme dit Tite Liue, qu'ils eussent l'œil, qu'il ne se troublast quelque chose en leur droict diuin, par introduction de nouuelles & estrágieres ceremonies, au mespris de la religion ancienne. Et apres que lules Cæsar sur demeuré vainqueur de tout l'Empire Romains, voulant cosulter auec ses particuliers amys, des moyens de la reformation de la Republique, fut conseillé par Mecœnas

te

celebre Senateur, de ne permettre iamais aucun changement en la religion, comme estant cela vn moyen fort propre pour introduire choses nouuelles & troubler vn estat. Assez d'autres pareils exéples se pourroient trouuer en l'ancienté, lesquels i'obmettray, pour ne perdre dauantage de temps en chose si claire. Mais si les anciens idolatres incertains de ce que ils debuoient croire, & n'ayans autre cognoissance de Dieu, que celle que la nature parmy les tenebres & obscuritez de la raison humaine, leur faisoit veoir, sans aucune scintille ou lumiere de la diuine grace, ont esté si soigneux & opiniatrement curieux de maintenir leur religion absurde & ridicule: combien à plus forte raison nous Chresties, qui auons la certitude de nostre creance par l'inspiration

C iij

du sainct Esprit, par la propre bouche de Dieu, par la presence humaine de son cher Fils, par la doctrine de sa parolle, par les miracles de sa vie, par sa mort & passion, par le sang de tant de martyrs, par le sçauoir de tant de doctes personnages, & par la succession continuelle de l'Eglise, combien dis-je, debuons nous estre affectionnez à soustenir ceste nostre religion, de laquelle nous auons tant d'asseurez & suffisans tesmoignages? Combien debuons nous defendre ardemment cestefoy que nous auos approuvée de silong temps: & combien debuons nous auoir en horreur de veoir vn autre croyace de Dieu, que celle, par laquelle nous sommes appellez à Î Esvs Christ, regenerez par son Baptesme, & nourris & alliez auec-

ques luy par ses saincts Sacremens? Car si ceste resolution de conseruer inuiolable la religion, a esté commune à toutes les nations du monde, combien est elle plus propre & plus particuliere à nous Chrestiens, qui ne retenons pas nostre religion seulement pour la conservation de ceste societé ciuile, mais en attédons selon nos œuures & actions vne certaine & eternelle aprés ceste vie? Et auons tat d'asseurace de nostre foy, & sommes enseignez par icelle, que si vn Ange du ciel venoit pour nous insinuer vne aultre doctrine, que celle que nous receuons par la tradition Apostolique, que nous ne luy prestions aucune foy ou audience. Qu'il nous vienne en memoire ce qui est commandési exactement en la loy de Dieu, que si nostre frere, nostre fils, nostreami, & celuy que nous aymons comme nous mesmes, voire nostre propre femme, nous veult attirer à vne religion aultre que celle du Dieu viuant, que nous ne l'escoutios point, mais soyons seueres & rigoureux à les chastier. Comme donques assemblez en la societé ciuile nous debuős maintenir premieremét nostre religion: mais comme Chresties nous y auons vn debuoir plus particulier, tant pour l'asseurace que nous en auons, que par le commadement exprés sorty de la bouche de Dieu. Mais auec tout cela, comme bons & naturels François, nous y auons vn autre debuoir qui nous y astraint oul tre ces precedentes obligations.

La France a esté celle, qui depuis auoir receu publiquemet la foy chrestienne soubs Clouis, l'a toussours

gardée

25

gardée immuable & inuiolable d'vn mesme cours. La France n'a iamais admis dedans son sein, les peruerses opinions de la foy. La France, tandis que tout le reste de la Chrestienté estoitagitée, par les pernicieuses diuisions de tat de diuerses sortes d'heresies, qui ont regné iusques à maintenant, a toussours demeuré vnie & constante, sans se laisseraller à aucune faulse doctrine. La France a esté le secours & la defence de la foy Chrestiene, & laterreur des ennemis d'icelle. La France en somme atoussours esté come vn rocher ou fort inexpugnable de la Chrestienté. Et combien seroit elle descheuë maintenant de son ancien honneur, combien auroit elle perdu de sa reputatió, combien máqueroit elle de sa premiere fidelité enuers Dieu, si changeant sa fermeté

D

& constance au faict de la foy, elle viuoit longuement ainsi diuisée, & enduroit deuant ses yeux iadis si jaloux de l'vnion de la croyance Chrestienne, vne liberté, mais plustost licence intolerable de viure souz diuerses religions? Et pource, SIRE, vos treshubles & tresobeissans subjects, les gés de l'ordre Ecclesiastique, estiment que vostre Majesté prendra en bonne part, suyuant le zele & affection singuliere qu'elle a tousiours monstré enuers la foy Catholique, ceste treshumble requeste qu'ils vous fot, de vouloir maintenir vn seul exercice de religion en vostre Royaume, en chassant promptemet tous Ministres qui en enseignent vn autre, que celle que vous sçauez estre la vraye, Catholique, Apostolique, & Romaine. En quoy ilsne doubtent point que

vostre Majesté ne soit disposée d'vn sainct & treschrestien desir, veu que l'honneur de Dieu, qui vous est si cher, & qui a esté si licentieusement par le passé foulé aux pieds en ce Royaume, vo9 y incite: & que la charité que vous auez enuers ce peuple comis soubs vostre Empire, & que vo° aymeztát, vous y appelle, & que la reputation & estime de vous & de vostre courone iadis si florissate, vo? y pousse assez ardemmét. Car vostre Majesté recherchant la memoire des choses passées, recognoistra assez, que tant que la France a esté vnie soubs vne mesme religion Chrestienne, elle a faict voler sa gloire & renommée par toutes les contrées du monde: elle a faict sentir la valeur de ses armes par tous les coins de la terre: elle a tousiours esté victorieuse sur tous les ennemys de la religion catholique, & a fait tat d'actes heroïques & d'heureuses conquestes contre les infidelles, qu'elle s'est aquise vne telle gloire entre les Asiens, Affricains, Indiés, Perses, Tartares, Mores, Sarazins & autres, que tous les Chrestiens qui sont en l'Europe, sont par eux nommez François. Car pour n'auoir ces nations estrangieres senty les armes d'autres Chrestiens que des François, ils ont aussi comprins soubs le nom honnorable de France & des François, toute la Chrestienté La-

Mais depuis que la France a esté diuisée & deschirée en deux diuerses religions, voyons combien elle a perdu de son ancienne renommée. Celle qui commandoit à vne grande partie de l'Europe, qui conquestoit les

Royaumes loingtains, & qui faisoit de son seul nom trembler les nations les plus belliqueuses, s'est veuë depuis ceste malheureuse & infortunée division reduitte à telle extremité, qu'au milieu de son sein elle a receu les armes estrangieres: elle à quasi pris la loy de ses voisins & de ses ennemis: & cruelle, tournant son glaiue contre ses propres entrailles, bien qu'elle fut inuincible à toutes les autres nations, s'est abatue, vaincue, & ruinée elle mesme. Et cela est le fruict qu'a produit ceste venimeuse plante de nouuelle opinion, qui semble bien estre proche de pousser encores des reiettons plus dangereux, si suyuant l'expectation que vostre peuple obeissant conçoit de vostre prudence & pieté, il ne vous plaist d'y pourucoir promptement.

D iij

Souuienne vous, SIRE, que vous portez en main le sceptre de ce grand Roy Clouis, qui premier regla ceste Monarchie soubs la profession publique de ceste religion, laquelle est maintenant remise en doubte en ce Royaume. Souuiene vous que vous éstes successeur de ce grand Childeberg, qui ne pouuant patir à l'entour desoy ceux qui sentoient mal de la religion Chrestienne, entreprit la guerre contre les Visigots, qui s'estoient laissez infecter de l'heresie Arrienne, & en fin les contraignit de reuenir en l'vnion de l'Eglise saincte & Catholique. Souvienne vous que vous portez sur la teste la couronne de ce Charles, qui pour la gradeur & valeur de ses faicts a meritéle surnom de Grand, & par la vertu de ses armes auança la religion Chrestienne,

& defendit l'auctorité du sainct siege Apostolic contre ceulx qui le persecutoient. Souuienne vous que vous tenez la place de ce celebre Philippe Auguste, qui auec tant de zele & affection, employa ses armes contre les Albigeois heretiques, qui s'estoient sequestrez de l'vnion catholique. Souuienne vous que vous seez aussege de ce tant renommé sainct Loys, lequel n'espargna ses moyens, ses forces, & sa propre personne, pour la defense & propagation de la foy de Iesus Christ, & parses Chrestiennes actions, merita la courone & surnom de Sainct. Et sans m'amuser dauantage à les racompter tous, souuiéne vous que vous estes petit fils de ce grand Roy François, lumiere de la pieté de France, fils de ce victorieux Héry, la memoire duquel viura eter-

nellemet, & frere de ces deux catholiques Princes, François second, & Charles neufiesme, à qui Dieu face paix. Mais encores qui vous touche de plus prés, souuienne vous, SIRE, souuienne vous que vous estes ce renommé Henry, qui estant encores Duc d'Anjou, & frere de Roy, auez eu la defense de l'Eglise, fait de si valeureuxactes, gaignétant de grandes batailles, & tant de fois domptéles ennemis de la foy catholique, que vous auez remply toute la Chrestienté des merueilles de vostre nom vi-Ctorieux. Et nous pésons bié, SIRE, que vostre Majesté n'a point si tost misen oubly, ce grand & solemnel serment qu'elle a faict à son Sacre, no seulement de maintenir la Religion Chrestienne & Catholique, mais encores de l'auancer à son pouuoir, sans

en tolerer aucune autre. Et si iamais aucun serment a peu obliger vn Prince à maintenir & garder sa foy, cestuy cy vous astraint si estroittement à la desense de ceste religion, que vous ne pouuez en endurer aucune autre, sans faire force à vostre coscience, & mettre par aduenture en doubte le droict que vous auez à la Courone. Car vous sçauez bien que vous auez stipulé & contracté auec Iesus Christ, que vous acceptiez le sceptre à ceste condition, d'estre defenseur de sa religion Catho lique: voire qu'en ce solemnel iuremét vous auez prins pour erre & pour gage son precieux corps & son precieux sang. Et manquant maintenant à ceste foy si religieusement iuree, ne pensez vous point qu'il doiue s'irriter à l'encontre de vous? ne cognoissez vous point, que tous les maulx que nous auons enduré, prennét leur ori-

E

gine de son iuste courroux? Et ne voyez vous pas, que vous ayant donné ce sceptre auecques telles conditions, il vous menace de le vous arracher des mains, si vous ne luy tenez ceste promesse que vous luy aucz faicte si solemnellement? Et tout ainsi come Dieu vous semod à l'obseruation de la foy que vous luy auez donnee:vos subiects par icelle mesme vo coniurent à leur garder les coditions, auec lesquelles vo' estes fait leur Roy: & que vous ne pouuez enfraindre, rompant vostre iuremét, que vous ne perdiez aussi le tiltre que vous portez de treschrestien. Et nous ne faisons point de doubte; que remettant ces choses deuant vos yeux, que reueillant la memoire de vos predecesseurs, & continuant vostre premiere prudence & vertu, vous n'ayez ce bon heur de veoir envosiours tout vostre peuple reduit à la bergerie de l'Eglise saincte & catholique, de laquelle vo? estes comme pere & protecteur.

Par ce moyen ces grans Roys de Ierusalem Dauid, Salomon, Abia, Io-Saphar, Ezechias, Iosias, se sont acquis la benediction de Dieu, & yn succés fauorable en tous leurs affaires, pour auoirauecques tant de diligence remis la pureté de la religion, & restauréle seruice divin qui estoit depraué. Et nous esperons aussi, que suyuant leurs traces & vestiges, vous reiinirez toute la France en la religion Catholique. Et pour la recompense de vostre sainct desir, aurez ceste benediction de Dieu, de veoir en vos iours vostre Royaumeaussi florissant qu'il fut onques. Et comme cela sera fort agreable deuant Dieu, aussi sera-il grandement honnorable à vous & à vostre Couronne. Ce que vous cognoistrez

E ij

assez, si vous cosiderez, qu'il n'y a au-'iourd'huy Roy, Prince, Potentat ou Republique (i'en excepte quelques peuples Barbares & le Turc, les detestables mœurs & coustumes duquel nous doiuent estre si odieuses, que le seul nom nous en doit faire horreur) qui permette à ses subiects de viure en autre religion, que celle que le Magistrat par la decision de l'Eglise, tiet pour seule, bone & vnique. Et ne sont certes dignes d'estre entendus ceux qui veulent tellement restraindre la puissance du Prince ou du Magistrat, qu'il ne puisse cotraindre ses subiects à la foy, mais les doiuent laisser viure en liberté (comme ils disent) de conscience. Car ceste opinion a tousiours esté condemnee & reprouuee generalemet de tous les Chrestiens, sinon par les Manicheens & Donatistes, qui desendoient, qu'il ne falloit presser

personne pour sa religion, mais laisser chacun en sa liberté & fatasie. Et ceux là mesmes auiourd'huy qui arrachent de vous comme par force ceste liberté de leur religion, ne la permettent aux autres. Car és lieux de la Chrestieté où Dieu a permis qu'ils soient les maistres, & ayent la puissance en la main, tant s'en fault qu'ils accordent à ceux qui sont Catholiques de viure librement en leur religion: qu'au contraire les sectes diuerses qui sont entr'eux (car desia ils sont bendez, & diuisez, signe euident de leur prochaine ruine) ne se peuuent compatir l'vne l'autre. Et là où le Caluiniste est le maistre, le Lutherien n'ose viure librement: voire mesme que quand ils changent de Magistrats de diuerses opinions, la religion change suyuant sa volonté: comme lon a veu assez de ces mutations en Angleterre & en

E iij

beaucoup de lieux en Alemaigne. Et quoy, seroit-ce pas vne honte & vergoigne trop grande au bon Chrestien & fidele Catholique, s'il estoit moins affectioné à sa religion, qui est aprouuée par vne si longue & continuelle succession, que ces nouveaux Chrestiens à leurs opinions si recentes, qui sont nées comme en vne nuich? C'est donc vne maxime generalement certaine & aprouuée de l'Eglise par toutes les Republiques, que le Magistrat doit & peut cotenir son peuple soubs vne mesme foy: comme il se monstre assez par tant de belles loix & constitutions des Chrestiens & catholiques Empereurs, come Constantin, Theodoze, Valentinian, Martian, & d'autres, & tat de belles ordonances establies par les Roys vos predecesseurs.

Mais parce que non seulement ceux qui se sont sequestrez & desunis de la bergerie de l'Eglise, ont abusé & seduit beaucoup de peuples, soubs le pretexte de la corruption qui estoit entre les Ecclesiastiques, & des abus qui sont coullez parmy eux: mais encores ceux qui sont demeurez soubs l'obeissance de la foy catholique, deplorent infiniemét le desordre qu'ils y cognoissent. Nous dirons & confesserons librement auec eulx, que nous n'en portons point moins de regret, voire en sentons vn desplaisir incroyable: mais nous adiousterons bien aussi, que la licence de nos malheurs passez a beaucoup deterioré le mal, & empesché iusques icy le sainct desir que les gens de bien onteu, de restaurer la discipline Ecclesiastique, & faire vne reformation generale de tout ce qui estoit corrompu en icelle. Étauec ceste commodité que les Ecclesiastiques ont eue en ceste as-

semblee de conferer ensemble, ils esperent soubs vostre auctorité executer vne reformation si canonique, que Dieu en demeurera loué, vostre Majesté contente, & vostre peuple satisfaict. Et pour leur en donner le moyen, ils vous supplient treshumblement vouloir faire publier & auctoriser en vostre Royaume, suyuant la priere qu'ils vous en font plus particuliere par leurs remonstrances, le sainct & sacré Concile de Trente, lequel par l'aduis de tant de doctes personnages, a exactement recherché tout ce qui est necessaire pour remettre l'Eglise en sa premiere splendeur. En quoy, SIRE, ils esperent & attendent de vous, comme d'vn Roy treschrestien & tresaffectionné à l'Eglise de Dieu, l'assistance de vostre auctorité, pour l'execution de ceste reformation. Et pource que le premier poinct

poinct en est, que l'Eglise soit pourueuë de bons & diligens Pasteurs, & qui par la vertu de leur doctrine & exemple de leur pieté & integrité, puissent redresser ce qui est tombé, r'asseurer ce qui est esbranlé, & esclairer ce qui est obscurcy : ceux de l'ordre Ecclesiastique vous suppliét treshumblemet, qu'il vous plaise remettre l'ancienne forme & maniere de l'election aux Prelatures de l'Eglise, suyuat les saincts Canons & Decrets. Quiscrale moyen pour faire, que la porte pour entrer aux Prelatures Ecclesiastiques, ne soit plus comme elle a esté iusques icy, si apertemet ouuerteà la faueur, ambition, & symonie, que lon a veu y regner, auec vne licéce si effrence, que le commerce & trafic en estoit pareil, & pire paraduenture, que des biens temporels mesmes. Ce qui a procedé de ce que la

F

pluspart des biens destinez pour le seruice de Dieu, sont tenus & principalement occupez ou manifestemet par personnes laiz & non Ecclesiastiques, ou indirectemet par certains cosides, quine sont gueres differes d'eux, au grand scandale & preiudice de la religion & Eglise catholique. Nous lisons aux histoires Françoises, que du temps de Loys sixiesme, surnommé le Gros, les gentils-hommes s'estoient donnez telle liberté, qu'ils occupoient non seulement partie des bies Ecclesiastiques, comme le Comte de Clermont les bies de cest Euesché, le Seigneur de Roussy les terres de l'Eglise de Rheims & de Laon, le Seigneur de Meung, celles de l'Euesché d'Orleans. Mais encores s'attribuoient le tiltre des Prelatures, come le Seigneur de Beaujeu, l'Abbaye de Sauigny en Lyonnois, & d'autres

l'Abbaye de sainct Denys en France. Mais ce bon Roy ne pouuant endurer ce desordre en l'Eglise, print les armes contr'eux, & vertueusement les contraignit de remettre les Eglises en leurs biens, libertez & franchises, cognoissant bien que ceste confulion traineroit apres soy vne infinité d'autres desbordemens en l'Eglise. Ainsi esperons-nous, SIRE, que suyuant l'exemple de ce bon Roy vostre predecesseur, vostre Majesté laissera les Prelatures de l'Eglise, & leur election entre les mains des personnes de ceste vacation: & empeschera que les laiz ne les possedent & détiennent en tout ou en partie, directement ou indirectement. Et pour cest effect reuoquera dés à present tous dons, promesses, & reserues, vraye corruption de toute la discipline de l'Eglise.

Fij

Et si nous auons ce bon heur, lequel tout vostre peuple attend de vostre pieté, que les dignitez Ecclesiastiques soient distribuees selon l'integrité de la vie, & la sincerité de la doctrine: nous ne faisons point de doute de veoir en bref l'effect d'yne salutaire reformation. Come au contraire sans cela il seroit impossible de faireaucun bon fondement pour restablir la discipline Ecclesiastique. Et sçauons toutesfois, que de là seul depéd le principal moyen de la reunion de tous vos subiects, soubs l'obeissan ce de la religió catholique. Car quad les Prelats residans en leur charge, & vueillans sur leurs troupeaux (& tels seront-ils quand par la vertu ils aurot esté appellez & esleus) auront l'œilà faire cathechiser la ieunesse, &instruireles ignoras, & leur declaireront les approbations & raisons des sainctes ordonnances de l'Eglise: il n'y a point de doubte, qu'en bien peu de temps nous n'en voyons vn tel fruict, que les Catholiques les embrasserot beaucoup plus deuotieusement: & les desuoyez admirans la sagesse & prudence de l'Eglise saincte, guidée en tout & par tout par le sainct Esprit, sereduirot peu à peu soubs son obeissance. Et par tels moyens les plus grandes & dangereuses heresies ont esté plus que par les armes, extirpées & estaintes. Et par l'effect de ceste saincte reformation, soubs vostreauctorité, nous esperons de veoir en brief ceste pernitieuse erreur, qui a troublé tout ce Royaume, s'en aller & s'euanouir en vapeur & fumée.

Mais nous auons iusques icy assez amplement parlé de ce qui apartient à la generalité du faict de la Religion, qui est le premier fondement de l'e-

F iij

stat. Remettant donques les poincts particuliers à ce qui est porté par le cayer de nos remonstraces, nous discourrons vn peu de la police, qui est le second poinct que nous au os promis & proposé de traitter. Ce que nous ferons le plus briefuement qu'il nous sera possible, & d'autant plus hardiment que nous voyons, qu'auec tant d'attention, il plaist à vostre Majesté nous entendre.

Tous ceux qui ont escrit de l'institution politique, ont estimé que la tranquillité commune & le repos public, estoit l'vn des buts & sins principaux de la societé ciuile. Comme à la verité les Seigneuries vnies ont prosperé & sleury: & discordantes, elles ont esté malheureusemet deschirees. Et pource disent les Philosophes, que le premier office d'vn Roy, est de maintenir ses subiects en cocorde. Et

en cela, SIRE, auectat d'autres vertus qui reluisent en vous, nous cognoissons cobien vous exercez l'office d'vn bon & equitable Roy ayant fait veoir cy deuant à chacun, encores que vous soyez de vostre nature belliqueux, combien vous estes desireux de la paix, que vous auez si cheremet acheptee. Et recherchat maintenant auec vos fideles subiects les plus seurs moyens pour conseruer en repos vostre Royaume, qui semble en auoir bon besoin.

Il y a tantost quatorze ou quinze ans que nous auons veu faire la guerre inhumaine & cruelle les vns aux autres, gés de mesme nation, de mesmes prouinces, de mesmes citez, pere contre fils, frere contre frere, parent contre parent: tous subiects d'vn mesme Roy, honnorans mesmes armes & enseignes de sleurs de lis. Et

toutesfois nous sommes si aueuglez, que nous ne recognoissons point que Iesus Christ, qui est la verité mesme, & qui iamais ne peult mentir, nous a asseuré, que tout Royaume diuisé en soy sera desolé. Et qui est-ce qui ne voit & ne sent desiale fleau de ceste desolation? Nos champs au parauant fertiles sont laissez en friche, les superbes & riches maisons demeurent desertes & abandonnées, les villes iadis celebres & opulétes restent desolées, par la perte de tous leurs ancies ornemens des edifices tant priuez que publics: & qui pis est, les prouinces sont distraittes & come cantonées par vne discorde trespernicieuse. Saluste histo rien tresrenomé, predict long téps au parauant, que la ruine de Rome n'aduiendroit iamais, que par vne diuision entre les citoyens d'icelle. Puis qu'il est ainsi, dit-il, que toutes choses

qui ont commencement prendront aussi sin, lors que la ruine de la Repuque Romaine approchera, les citoyés combattront contre les citoyens. Car autrement tout le mode ensemble ne pourroit esbraler cest Empire. Et certes sa preuoyance ne fut point vaine, car ceste Seigneurie qui auoit sleury par la bonne intelligéce qui estoitentre les citoyens, se perdit & ruina par les diuisions d'vnSylla, Marius, Cæsar, Pompée, Antonius, Lepidus & Auguste:lesquels, au danger de leur patrie, suyuoient la vengeance de leurs factions & haines particulieres. Et non seulement l'Empire Romain, par semblables partialitez s'est veu descheoir de sa premiere grandeur, mais encores toutes les plus fortes Republiques du monde, par semblables divisions ont esté miserablemet ruinées. L'Empire d'Alexandre, le plus grand qui eust

point esté, s'euanoüit comme vn seu d'estoupe par la division & desordre qui fut entre ses successeurs. Les villes de la Grece, qui autremét estoient inuincibles, par leur mauuaise intelligece vindrét soubs le pouuoir, partie des Macedoniens, & partie des Perses. La Gaule tant de fois assaillie par les Romains, ne peust estre subiuguée, que par le moyen de la diuision que Cæsar y trouua, de la commodité de la quelle il se seruit pour sa coqueste. L'Empire de Constantinople par les partialitez des Princes est venu soubs le pouuoir tyranic & miserable d'vn Ethnic & barbare Turc. Ces exemples ioincts auec ceste belle preuoyace de Saluste, ne nous font ils pas veoir à l'œil, que si nous n'y remedions, ce beau & florisfant Royaume, autresfois agrandy par la concorde & obeissance de nos ancestres, est prest de tomber en vne grande desolation & misere par nos

51

factions & partialitez? Et qui pis est, nous ne nous contentons pas de desmesler nos querelles nous-mesmes, mais encores lon vaiusques en Angleterre & Alemaigne chercher les armes estrangieres, voulant, ce semble, leur, dresser vn chemin pour nous mettre soubs leur miserable seruitude. Et ne considerons pas que la calamité la plus notable que soit iamais aduenue aux Republiques diuisées, a esté quand les citoyés partiaux ont appellé les estrágiers à leur ayde, qui souuent ayans retenu ce chemin, s'en sont puis aprés faicts les maistres.

Lors que la Gaule estoit encores diuisée en diuerses Seigneuries, les Sequanois appelleret les Germains à leur secours, & par leur ayde destruisirent quasi ceste belle ville des Autunnois. Mais la victoire sut plus perniciouse aux vainqueurs qu'aux vaincus. Car ils furet cotraints de bailler quasi la moi-

G ij

tié de leurs terres aux Germains, qui les auoiét secourus: lesquels à la logue chasserét tous les originaires du pays, & se firent seigneurs quasi de toute la Gaule. L'Empire Romain ne receut iamais tant de dommage, que par les Lombards, qui furent premierement attirez par Narses pour chasser les Gots hors d'Italie. Et depuis ayans esté rappellez par luymesme, pour le mescontentement qu'il auoit des iniures qu'il auoit receues de l'Imperatrice Sophie, mirent en proye & pillage toute l'Italie: si bié qu'il fallut derechef faire venir les François, lesquels ayans retenu le chemin, y ont fait depuis come les autres, de grandes & heureuses conquestes the same of the

Mais pourquoy cherchons nous des exemples estragiers, veu que nous en auons de domestiques? Les seditios & guerres d'Orleans & de Bourgon-

gne nous appellerent les Anglois en France, qui par ce moyen y prindrent si grand pied, qu'ils en possederent so-guement apres vne grande partie. Les François donques, qui pour fortisser leur part, inuitent les estrangiers, ne semble il pas qu'ils cherchent le chemin le plus court, pour perdre leur pays, par les mesmes moyens qui ont ruiné les estats des plus florissantes Republiques? Tels sont donques nos maulx, telles sont nos miseres.

Mais voyons maintenant s'il y auroit point de moyen pour arrester ce
cours continuel de nos malheurs. Plutarque, en son liure des maniemes des
affaires publiques, amene à ce propos
vne belle sentence, & qui semble dóner vn fort bon enseignement. Quad,
dit-il, le seu se met en vne ville, le plus
souuent il ne commence pas par vn
temple, par yn palais, ou par autre

G iij

lieu public, mais se couue & se recele dans le recoin de quelque maison priuée, & de là se glissant & coulant bien auant das la ville, la gaste & difforme, auec vn dommage irreparable. Aussi, dit-il, iladuient souuent, que les seditions ne prénent pas leur commencement des negoces publiques, mais par les offenses particulieres de quelques personnes notables, qui se fortifias de quelques factios & pars en la Republiques, esbralent bie souuet tout l'estat. Et il confirme cela par l'exemple de deux grandes seditions aduenues en Delphes & en Siracuze, pour de bien legieres contentions entre quelques particuliers: & toutesfois de si petite cause, sortit vne grande ruine en ces deux villes. Et si nous recherchons les exéples modernes de cela, nous trouuons que du temps de l'Empereur Iustinia, pour maintenir des couleurs de bleu & de verd seulement, il s'esmeut vne telle seditió en la ville de Constátinople entre quelques gens partiaux, qu'il y mourut en vn iour plus de trente mil hommes. Et l'Empereur mesme fut en grand danger de perdre & son Empire & sa vie. Et ceste grandefaction di bianchi, & di neri, qui a tenula Republique de Florence en vne grande sedition, & qui s'espandit depuis par toute l'Italie, commença par vne bien legiere occasió entre les personnes priuées. Et partat semble estre fortbon le conseil de Plutarque, qui entre les plus grands preceptes qu'il donne à celuy qui gouuerne vn estat, l'admonneste principalement de ne laisser croistre les contentions entre les grands, mais de chercher tous les moyens pour les estaindre dés le commencement, & euiter que par la consequence elles ne menent aprés soy

quelque sinistre euenement.

Nous ne voulons pas dire que les querelles particulieres ay et esté la cause de nos maulx, & origine de nos calamitez: mais si voyons nous bien que les inimitiez & factions particulieres, ont longuemet entretenu nostre malheur. Et s'il n'y eut point eu de pars en ce Royaume, les tumultueux n'eussét silong temps entretenu les troubles

qui nous affligent.

Le plus grand bien donques que vostre Majesté sçauroit faire à vostre Royaume pour tenir la paix en son pays, & son peuple en repos, sera de recognoistre toutes les inimitiez, factios & mescontentemens qui y sont, & chercher les moyens de les composer, non en apparéce seulement, mais par quelque bon effect, contentant ceux, si iustement il se peut, qui se disent mal contens: donnant asseurace à ceux qui

se disent auoir cause de desiance, & reconciliant ceux qui se tiennent pour ennemys. Et semblera estre fort à propos de prendre l'exemple des anciens Atheniens, qui aprés leurs logues inimitiez & seditions, pour chercher vn repos, firet vne loy, qu'ils appellerent d'amnestie, c'est à dire, d'oubliance: par laquelle ils abolissoiet entieremet la memoire de toutes les pertes, calamitez, & iniures passées. Laquelle encores voulurent imiter les Romains, par le conseil de Ciceró, apres les guerres ciuiles. Et sembleroit maintenant fort à propos de la pratiquer, effaçant le souvenir de tout ce qui s'est passé contentieusement entre nous, auec vne abolition generale de toutes les choses qui sont sorties de nos guerres ciuiles, pour n'en estre iamais rien recherché, non plus que si iamais elles n'estoient aduenues. Et cela costimer

en ceste presente assemblée, pour estre chose à iamais inuiolable. Et puis ayat ainsi doucemet ordonné pour le passé, vostre Majestésera treshumblemet suppliée de faire pour l'aduenir, vne loy generale du consentement des estats, & qui aura mesme authorité que la Salique: par laquelle sera defendu tres-expressémet à toutes sortes & manieres de ges, de dresseraucunes pars, -associations, ou ligues, de traitter des affaires du Royaume auec les estrangiers, les solliciter de venir en Frace, ou faire leuée de gens, soient estrangiers, soient François, sans le consentement & exprés commandement de vostre Majesté. Et que toutes personnes qui directement ou indirectement aurot: contreuenu à ladicte ordonnance, soient tenus pour rebelles, ennemys du pays, & perturbateurs de l'estat: que leurs biens soient inseparablementioints & vnis à la couronne, & eux incapables de toutes dignitez & honneurs. Car puisque & le mal que nous auons senty iusques à maintenant, nous monstre combien de domage ont apporté telles ligues & factions, & que l'exemple de tat de Republiques ruinées par semblables partialitez, & par l'introduction des armes estrangieres, nous menaçent d'vne pareille & prochaine ruine: vos treshumbles, tresobeissas, & tres-fideles subiects, s'ayderont de tout leur pouuoir pour vous faire obeir, tant en ce poinct, qu'en tout ce qui aura ofté par vous arresté en ceste tant belle & notable assemblée. Et s'il y a quelques gens si temeraires qui s'osent opposer à vos ordonances, Dieu premieremet combattra pour vous en si iuste querelle, & vos treshumbles subiects vous y assisteront.

Hij

La tranquillité donques publique, l'vnion de vos subiects, la reconciliation de toutes inimitiez, l'oubly de toutes les choses passées, l'abolissemet de toutes factios tant ciuiles qu'estrágieres, soient le premier fondement de la police, sans lequel nous n'estimõs rien pouuoir estre ferme & stable. Le reste consistera en bonnes & sainctes loix,&iustes,& seueres Magistrats.Et de l'vn & de l'autre nous parlerons en termes generaux, remettat les poin&ts & articles particuliers à ces cayers de nostre remonstrance.

Et pour dire des loix premierement: si iamais Royaume Chrestien s'est peu donner louange d'estre heureux en bonnes institutions & ordonnances, la France plusque nul autre peut estre glorieuse de ceste belle louage. Car si nous regardos & la premiere & ancienne institution de son

estar, & son succez & progrez, nous trouuerrons qu'elle ne cede en cela à quelque autre Monarchie. Ce que nous pouuonsiuger tant par ce que il n'y a poinct aucun qui puisse appartenir à la conseruation commune, ou aux faicts particuliers concernans chacun, à quoy il ne se trouue que les Roys par leur sage conseil, n'ayét prudemment ordonné: comme d'autant que quasi toutes les nations nos voisines ont emprunté & desrobé de nous, la pluspart de leurs loix & meilleures ordonnances. Et est bien à considerer la sorte & la maniere de la quelle sont composées nos loix, qui est beaucoup meilleure, plus douce & gratieuse que celle de laquelle ont vsé tous les Roys, Princes, & Potentats de la terre. Car il semble que le peuple François aye seul suyuile precepte ciuil &politique de ce grad Philosophe

H iij

Platon, qui vouloit que les loix par vne douce persuasió incitassent plustost les subiects, que de les cotraindre par simples & seueres comandemens. Et lisons toutes les loix anciennes des Perses, Atheniens, Lacedemoniens, Romains, & autres, & fueilletons les modernes encores, & nous verros que tous leurs legislateurs se sont seulemét contentez d'ordonner telles & telles choses absoluëment, & sans aucune raison, ou persuasion de leurs ordonnances. Mais les Roys de France, qui commandent à leurs subiects comme les peres à leurs enfans, en leurs institutions semblent plustost vouloir instruire par viues raisons & douces remonstrances leurs peuples, que de les cotraindre par la force de l'obeissance. Carparles exordes & preambules, ils ecl arent les causes & les raisons qui les ont esmeus d'ordonner ainsi, affin

que leurs subiects se rendent plus obeissans pour l'amour de la vertu, & de la raison, qui est le fondemet principal de la loy. Et si en toutes les plus grades louanges, dont les anciens ont celebré Antoninus Pius, Prince bon entre les bons, ceste cy en est vne, qu'il n'a iamais rien ordonné, qu'il n'ayetasché defaire trouuer bon par lettres particulieres, par lesquelles il rendoit raison de ses ordonnances. Cobien doibt estré pour ceste mesme cause honnorée entre nous la memoire de nos bons, iustes, & gratieux Roys, qui tous d'vn communaccord ont obserué ceste coustume, qui a esté comme singuliere à ce seul Prince tant recomandé par l'antiquité? Or puisque auec vne si belle maniere nous trouuons que les ordonnances & loix de Frace, ont suffisamment pourueu à toutes les choses necessaires à la con-

servation d'vn estat-, l'observation de ces anciennes loix, à laquelle nous ramenons toutes choses, semble estre beaucoup plus profitable & vtile, que d'en chercher ou composer de nouuelles. Car nous sommes enseignez qu'il n'y a rie de plus pernicieux à vne Republique, qu'vnetrop grade multitude de loix. Et tout ainsi comme quand vne personne est griefuement malade, il est reduit à vn tresmauuais party, s'il a affaire à vn medecin indocte & imperit, qui redoublat medecines sur medecines, corropt & altere les humeurs par ceste imprudete varieté. Ainsi debuons nous croire qu'en vn estat troublé, la multitude de loix sur loix, n'est guieres moins dangéreuse, que la multiplicité de medicamés das vn estomac debilité. Et puis que la reformation n'est rien autre chose, que leuant les nouvelles introductions & abus,

67

abus, reduire les choses en leur premiere & anciene forme: auec bo droit & iuste occasió nous auons par nos remonstraces plustost rapellé l'vsage & l'observatio des vieilles loix, que nous m'avons esté curieux d'en chercher de nounelles. Mais parce qu'elles ne sersont de rien, si elles ne sont seueremét & rigoureusement obseruées, l'vne des principales requestes, que nous auons à faire à vostre Majesté sur ce poinct, sera qu'il luy plaisese rédre seuere en l'observation & entretenemét de telles ordonances. Chose que nous nous promettos de sa iustice, pour l'asfeurance qu'il luy a pleu nous en donner en ceste eloquéte propositio, qu'il luy a pleu nous faire en l'ouuerture de ses estats, soubs la parolle & serment de Prince: lequel nous vous supplions treshumblement auoir tousiours deuat les yeux, pour enfaire vne defense

I

cotre ceux, qui par importunité voudroient vous forcer de les transgresser & enfraindre. Caril n'y a rien qui aye iamais tat fait fleurir les Republiques, que la constante observation des loix du pays. Et le premier signe que lon peult auoir de la perte d'vn estat, est quand lon voit vnelicence effrenée & facilité de dispenser des bones ordonnaces. Enquoy certes est digne d'estre notée vne belle sentence de Ciceron apartenant à ce propos, laquelle pour y estre fort propre ie reciteray, traduite de mot à mot. Les Republiques, dit-il, qui sont prestes de se perdre, estant toutes choses deplorées, tombent en ceste fin malheureuse, que ceux que les loix condamnent sont restituez; & les iugemens donnez se voyent rescindez: & quand telles choses aduiennent, personne n'ignore que leur tuine ne soit proche, & aucun ne

se peult donner esperance de salut.

Vostre Majesté donques, SIRE, euitera la ruine de vostre estat, quand elle se rendra non seulement difficile, mais encores inexorable en l'obseruation des ordonnances si solemnellement faictes, & gardera vne egalité en l'observation d'icelles, sans acception de personnes, puis qu'elles sont faictes pour les grands & pour les petits, pour les riches & pour les pauures. Car c'est vne chose de tresmauuais & trespernitieux exemple quad les loix sont rendues, comme disoit ce sage Grec, semblables aux tissus ou toilles d'iraignée, à trauers desquelles les oiseaux passent aisémét, & les seules mousches foibles & imbecilles y demeurer prinses & retenues. Soient donques vos loix inuiolables, seueremet obseruées, nonsubiectes à dispense, non fauorables aux grands, mais communes &

Iij

70

egales à chacun. Cela s'obseruera bien heureusement quand vostre peuple sera pour ueu de bons Magistrats, qui iugeas sans faueur, sans corruptió, sans difference du grandauec le petit, tiennent la balance iustement suspendue. Carles bonnes loix ne sont pas seulement inutiles, s'il n'y a de iustes Magistrats pour les faire obseruer: mais encores adujent-il quelquesfois, que les meilleures ordonnances du monde par le vice des officiers, tournent au dommage de la Republique. Et pource le premier soin que doit auoir vn prince, qui come vous desire l'heur & la felicité de la societé publique, est qu'elle soit aornée de grads & prudés officiers, qui rigoureusement entretiennent le lien de la Republique par la seuerité de leurs jugemens. Et c'est certes vne chose admirable de veoir combien la France a esté par toute la 71 £

Chrestiété celebrée & renomée, pour ceste insigne equité qui estoit obser-

uée par ses anciens Magistrats.

Il se trouuerra peu de Republiques, ou ancienes ou modernes, qui se puissent donner ceste louange, comme la France, que les Princes estrangiers se soient volontairement soubmis pour leurs differés à ses Iuges & Magistrats. Car nous lisons que l'Empereur Federic submit au iugement du Roy de France & de son Parlement, la decision de plusieurs differens & controuerses qu'il auoit auec le Pape Innocent quatriesme. Et du temps de Philippe le Bel, le Comte de Namursubit volontairement iugement soubs le Roy & son Parlement, encores qu'il eust pour partie Charles de Valois frere du Roy, tant il auoit de confience en l'equité de tels iuges. Et de mesme Philippe Prince de Taréte, bié

I iij

qu'estrangier, accepta volotiers pour iuge le Roy de France seant en son Parlement, sur le differend qu'il auoit auec le Duc de Bourgongne, pour certains fraiz qu'il couenoit faire pour le recouurement de l'Empire de Constantinople. De mesme sist le Duc de Lorraine, sur le procés qu'il auoit contre Guy de Chastillon son beaufrere, pour leurs partages. De mesme encores firent le Dauphin de Viennois, & le Comte de Sauoye, sur le differend de la foy & hommage du Marquisat de Saluce. Et en l'an mil quatre cens & deux, les Roys de Castille & de Portugal, en u o y er et par aucuns Cheualiers Espagnols, vn traitté & accord fait & passé entr'eux, pour le faire publier & emologuer en la Cour de Parlement de Paris, pour auoir plus d'authorité. Facent donc tất de compte qu'ils voudront les anciens Grecs & Romains

de leurs justes iugemens, de la reputation de leurs loix, de la renommée de leurs Magistrats, si ne trouuerront-ils pourtant aucun tesmoignagne si celebre pour leur gloire, come sont ceux icy, par lesquels la Iustice Françoise a esté generalement, & par le consentement de toutes les nations du monde grandement honnorée.

Mais, bon Dieu, considérons combien elle est decheue de ceste ancienne opinion & reputatio, veu que nostre pratique de procés generalement odieuse à chacun, est maintenant tenue plus pour chiquanerie que pour equité, plus pour corruption que pour integrité, plus pour vendition que pour iustice, plus pour faueur que pour droicture. Ie ne veux pas dire q'il ne se trouue auiourd'huy vn bo nombre de justes & equitables Magistrats, qui ennemis de tels desordres sou-

17:15

haittent & desirent ceste mesme reformation de la Iustice, laquelle tous les gens de bié vous demandent & requierent si instammet, SIRE. Mais ic ne sçay sinous oserons dire que la plus grand part la meilleure surmonte, au moins diros nous bié que la forme de laquelle les officiers ont depuis quelque temps en çà esté appellez à leur charge, est si pernicieuse, que lon la peult dire la mere de toute corruption & iniustice. Carc'est chose toute manifeste & aperte, que pour créer vn iugelo n'examine pas la capacité de son sçauoir, lonne iuge pas l'integrité de sa vie, lon ne met point en auat sa longue experiéce, lon n'a point de respect à l'aage & à la vertu, mais seulemet on regarde si les escus sot de poids. Et depuis que telles gens ont vne fois finácé, encores qu'ils soient trouvez incapables, si est-ce qu'ils impetret tant de

lettres de iussions, tant de commademens iteratifs, que l'on est contraint de les receuoir tels qu'ils sont, au preiudice de toute la Republique.

Les Philosophes ont estimé, que celuy qui ambitieusement recherchoit d'auoir quelque charge en la Republique par ceste seule pratique, se rendoit indigne d'obtenir iamais Magistrat, estant par là suspect, que plustost vn prouffit particulier & auarice l'y poussoit, qu'vn desir de bien faire à sa patrie. Et la mesme opinio auoit Alexandre Seuere, Empereur tresiuste, qui tenoit telles gens dangereux en vn estat. Et l'vne des plus grandes louanges que lon donne à ce iuste Prince, c'est qu'il ne voulut iamais tirer argét de la vente des offices ou Magistrats, disat qu'il faut que celuy qui achepte en gros, reuende puis aprés en destail, & qu'on ne pourroit honnestement

K

punir celuy qui reuend ce qu'il a achepté. Et les anciens Romains n'ont iamais rich tant craint, sino que d'introduire aux charges publiques des perfonnes par ambitió ou corruptió d'argét. Et iusques là ont esté curieux d'ostertoutes telles occasios de mal, que par la loy De ambitu on coupoit chemin à toutes sortes de fraudes & pratiques, quis'y pouuoient commettre. Et peult-on recognoistre combien ils estimoient que cela estoit important, en ce que iamais autre loy n'a esté si souvet repetée, comme celle de l'ambition, que nous trouvons en l'histoire Romaine auoir esté par quinze ou seize fois diuerses augmentée & refreschie. Mais entre toutes les plus mauuaises pratiques, le moyé d'y venir par argent a toussours esté tenu pour le plus vilain & deshonneste: voire mesme que celuy qui en estoit couaincu, receuoit grade honte d'infamie, & de cinq ans aprés n'estoit receuable pour estre faict officier public.

Et entre tous les plus grands presages que le sage Cato estimoit signifier la perte prochaine de la Republique Romaine, cestuy-cy en estoit vn, que non par la vertu, mais par menées & pratiques & arget on obtenoitles honeurs. Et si cela estoit vray, il sembleroit certes que nous aurions de grands indices de la diminutió & ruine de no stre Monarchie, puis que nous voyos apertement qu'il n'y a autre moyen en France de paruenir aux estats & dignitez publiques, qu'auec le pris de l'argent. Chose qui est certes grandement prejudiciable, & d'où il aduient de grads malheurs en France. D'autant que plusieurs gens de bien demeurent oiseux & sans estre employez, encores qu'ils peussent estre villes à la chôse

Kij

publique, qui par leur pauureté est pri uée de leurs vtiles seruices:où au contraire la Iustice est maniée en partie par quelques personnes incapables, & quin'ot autre vertu, sinon qu'ils sont riches, & ont dequoy payer contant. Vostre Majesté sera doc treshumblement suppliée, que quassant & annullant toutes taxes & venditions d'offices, voire mesme ostant tous moyens de faueur & ambition, lors que les offices vaquerot par cy apres, il luy plaise faire recherche en chacune prouince de quelques gens, le sçauoir & la preud'homie desquels soit cogneüe & approuuée pour les en pourucoir gratuitemet. Et parce que nous auos dit, que nous recherchions plustost le restablissemet des anciennes loix, que d'en introduire de nouvelles, vostre Majesté entendra, s'il vous plaist, que le Roy sainct Loys vostre predeces-

seur, Princeamateur de la pieté & iustice, fist vne ordonnance, par laquelle il statua, que tous offices publics fussent confercé par electio de trois personnes, qui seroit faitte par les autres officiers & citoyens des lieux: & qu'à l'vn des trois ainsi esleus, le Roy confereroit gratuitement & sans argent ledit office vaquant. Et ceste belle ordonnance a depuis souuent esté renouuellée par les Roys Philippes le Bel, Charles le Sage, Charles septiesme, Loys onziesme, & par le seu Roy Charles neufiesme, de bonne memoire, en ses estats tenus à Orleas. De sorte que telles institutions ne sont choses nouuelles, mais de log temps pratiquées & ordonnées en France. Et de là aduiendra, oultre l'heureuse administratió de la iustice, encores vn autre bie à la Frace: c'est que come l'honeur & la gloire sont les vrais moyens pour

K iij

inciter & esueiller les courages genereux, chacú s'estudiera de valoir quelque chose, lors que le seul merite & la vertu, & non l'argent, feront departir les honneurs. Chose qui a fait croistre l'Empire Romain en sa grandeur. Et nous esperós encores que nous pourrons veoir nostre Frace florissante, lors que le seul merite, & non le pris & la faueur seront le chemin, pour trouuer auancement.

L'ordre des choses semberoit requerir que nous parlissions en general de la discipline & police militaire: mais pource que cela est aliené de nostre mestier, & que l'on pourroit dire à iuste raison, que nous en parlerions comme clercs d'armes, nous n'en dirons autre chose, sinon que l'Europe, l'Asie, l'Afrique, & en general toute la terre, a prisé plus que nul autre la valeur des armes de la Noblesse Françoise, qui a tousiours esté en tel honneur entre tous les gens de guerre par tout le monde, qu'vn bien petit nombre de gensdarmes François, a faict redoubter les plus grandes & puissantes armées. Et qu'il n'y a point de doubte qu'elle ne se puisse veoir encores en ce poinct aussi storissante & victorieuse, qu'elle fut onques, si lon veut remettre sus l'ancienne discipline militaire de France. Car ce seroit mal à propos d'en chercher vne meilleure, ayant par ceste là esté faict anciennement tant de belles entreprinses & héureuses conquestes.

Auant que passer plus auat au troisiesme poince de nostre propositió, ie suis contraint de toucher vne complaince publique de to° les ordres de ce Royaume, qui est de ce qui est au reculemét de plusieurs bons & naturels François, lon voit les estrangiers

(quand nous parlerons des estrágiers, nous n'entendons d'y comprendre les Princes) appellez aux plus grandes charges & honneurs du Royaume, soit en l'estat Ecclesiastique, Politique, ou Militaire. Chose qui a esté trouuée fort iniuste, & reprouuée en toutes les seigneuries bien ordonées, lesquelles ont tousiours faict difference entre le citoyen & l'estrangier. Et la principale marque de recognoistre. l'vn d'auecque l'autre, a esté, que le citoyenseul & non l'estrangier, estoit capable des honneurs & dignitez. L'exemple de cela se pourroit rechercher en toutes les Republiques, & en plusieurs se trouuerroit encores que l'estrangier a esté generalement chasse, sans pouuoir aucunement estre receu: comme en Lacedemone, & à Rome mesme par la loy Petronia, & la loy Papia, les estrangiers

furent du tout bannis hors de la ville. Toutesfois ceste loy, comme dit Ciceron, fut tousiours tenue pour trop dure & seuere, & ne seroit receuable en la France, qui plus que nulle autre a esté humaine à caresser, & receuoir toutes sortes de gens, & ne voudroit encores perdre ceste louange de douce hospitalité Mais elle ne doit pourtant non plus que les autres, communiquer ses Magistrats à autre, qu'à ses propres enfansemognem a fistal de

En Athenes par la premiere institution, l'estrangier ne pouvoit estre fait citoyen, que par le suffrage de six mil personnes, & pour de grandes & importantes causes & services signalez. Et Demosthenes de son téps se plaignoit, comme d'une chose trespernitieuse, que lon bailloit le droict de citoyen à personnes de bien peu de valeur, veu qu'en l'ancienne institution

L

cela n'estoit pas accordé à ceux mesmes, qui auoiet bien merité de la Republique. Et quant aux Romains, ils ont toussours maintenu, tat qu'ils ont demeuré en leur entier, ceste loy si inuiolable, qu'ils ne vouluret iamais accorder le droict de citoyen mesmes aux peuples Latins, qui leur estoiet ou alliez, ou en leur obeissance, quoy qu'ils l'ayent auecques instace, & iusques à sedition quelquesfois demandé. Et est certes memorable l'histoire racomptee par Tite Liue à ce propos. Apres la bataille des Cannes, où les Romains furent dessaicts, & perdirét la plus grande partie de leur noblesse, & principalement quatre vingts Senateurs, sur la deliberation qui sut faicte d'en créer de nouveaux en leur place, Sp. Caruillus, opina qu'il falloit introduire dans le Senat quelque nobre de ges de bien des peuples

Latins, qui estoient en leur obeissance. Mais ceste opinion fut trouuce si absurde & pernicieuse par ce grand Capitaine & Senateur Quint. Fabius Maximus, qu'il fut d'aduis de la tenir perpetuellement cachee, & quelques autres Senateurs opinerent encores plus seuetement & rudement. Et tout ainsi comme les ancienes seigneuries ont estimé que c'estoit chose indigne de faire part de leurs honneurs aux estrangiers, les modernes encores se sont beaucoup maintenus auec ceste mesme opinion. Voire que Patrice Siennois, Euesque de Gayette, qui viuoit du téps de Ferdinad le vieil & Alphonse Roys de Naples, il y a pres de cet ans, maintiet en ses liures de la Republique, que ceste loy de ne comuniquer leurs dignitez aux estangiers, est vne des principales qui a conserué

Lij

Venize en sa gradeur. Ie laisse les exéples des autres peuples, pour ne me redre ennuyeux: mais ie ne puis passer soubs silence, que les loix de France, qui ont si bien pour ueu à toutes choses necessaires à l'estat, n'ont encores obmis de bien & vtilemet ordonner en cepoinct. Carenl'an 1431. du téps du Roy Charles septiesme, fut faitte vne ordonnance, par laquelle il estoit declairé, que tous estrangiers ou aubeins, estoient in capables de tenir offices ou benefices en France. Et ceste ordonnance sur pour seruir de loy irreuocable, publice en la mesme annee au Parlement de Paris, seant lors à Poytiers, pour la necessité des troubles qui estoiet en France. Et ne puis laisser passer ce beau coseil que donne Philippes de Comines en son histoire tat renommee, disant que c'est chose odieuse de donner offices, be87

nefices & grands maniemens aux estrangiers, qui ne peuuent estre iamais si propres ne si agreables, que ceux du pays. Et puis que c'est vn cosentement commun de toutes les nations, & comme vne loy de gens: vostre Majesté sera treshumblemet supplice, de pourueoir doresenauant aux charges publiques de ce Royaume, tant Ecclesiastiques, politiques, que militaires, les bons, legitimes & naturels François, qui ont & notable interest, & affection naturelle à la coservation de la France. Ce que ne peuuent auoir les estrangiers, soubs les quels ie ne comprens les Princes. Et nous croyons que cela sera l'vn des plus grans moyens pour reconcilier les esprits alienez & mal contens, de plusieurs gens d'honneur François, qui s'estiment estre mesprisez, voyant que lon prefere à eulx les estrangiers

L iij

paraduenture moins dignes. La tranquillité donques publique estat bien establie, toutes factions oftees, les anciennes loix remises sus, & inuiolablemet observees, les Magistrats non venaux, mais conferez par la vertu & merite aux bons & naturels François: nous tenons pour tout asseuré, qu'en brief nous verrons reuiure l'ancien honneur & splendeur de la France, & vostre regne aussi florissant par ceste belle reformation, comme il a esté infortuné par les malheurs & desordres passez.

Restele troissessme & dernier poinct que nous auons proposé, qui est l'vn des principaux sondemés & come le ners de la Republique: c'est à sçauoir les sinances. En quoy certes il s'offre tant de dissiculté, que se pense que tous les meilleurs & les plus subtils esprits de la France s'y trouverrôt confus & empeschez, principalemet pour deux contrarietez qui s'y trouvent si grandes, que malaisémet elles se peuuent compatir ensemble. Car d'yne part, c'est vne chose fort estrange & fort dure à vostre peuple, qui ayme & honnore son Prince, d'entendre que vostre Majesté ait esté contrainte, pour la necessité des affaires de ce Royaume, de vendre son domaine, engager bonne partie de tous ses reuenus, & soit encores grandemet endebtee. Et de l'autre aussi no croyos, que vous comme Roy trespiteux & debonnaire, ne pourrez entedre sans estre esineu de grande compassion, tác d'emprumpts, d'impositions & subsides, dont vostre peuple est affligé. Et pense veritablement, que s il estoit fidelement representé deuant les yeux de vostre Majesté, tout ce qui a esté leué depuis quelque

temps en çà par toutes les prouinces de vostre Royaume, tant par vostre commandement, que pour les fraiz qu'il a conuenu faire en chasque pays pour se dessendre & coseruer: la somme se trouverroit si grade & excessive, que vous auriez horreur de l'entédre, & seroit dissicile à nobrer. Et qui vouldroit estroit estre necessaire d'édendre & sonder iusques au plus profod la cause & origine dot il procede.

Nous croyons bien & sçauons certainemet que les desordres & grands debtes ne sont pas venus de vostre Regne, veu que le seu Roy Charles ix trouua dessa l'estat endebté quad il vint à la Couronne, de bien grandes sommes, à l'acquittemet desquelles la Royne vostre mere auoit proietté de bos & louables desseins, qui ont esté, au grad prejudice de la Frace interro-

pus par les troubles suruenus du regne du Roy vostrefrere, & du vostre, qui peuuent auoir donné grandaccroifsement à ce mal, tant par les fraiz extraordinaires qu'il a conuenu faire en la guerre, que pour auoir la pluspart des finaces & receptes generales esté occupees par ceux du party cotraire. Mais aussi sçauos nous bien que beau coup de grands Royaumes, estas outre mesure endebtez, par bon mesnaige sont sortis de ceste misere, auec le soulagement du peuple.

L'Empire Romain ne fut iamais tant apauury, qu'il se trouua apres la mort de ce monstre desbordé en tous vices Heliogabale, & toutes fois Alexandre Seuere, doux & gratieux Prince, incontinent apres sa mort rabaissa les impositions de plus de la moitié, & en quatorze ans qu'il regna, acquitta les debtes immenses de son prede-

M

cesseur, & fit la guerre aux Parthes, & peuples Septentrionaulx. Et l'vn des plus grands moyens de la bonne administration de ses deniers estoit, que ceux qui manioient ses finances, estoiet si curieusemet obseruez, qu'ils ne pouuoient le tromper, & la peine leur demeuroit certaine, si tost qu'ils estoiét descouverts. Et le Roy Charles v. pour ses vertus surnommé le Sage, en 17 ans qu'il regna, acquitta tou tes les débtes faittes par ses predecesseurs:paya grande partie de la rançon de son pere le Roy Iean, rachepta son domaine qui estoit engagé, & ne laissa pourtant de faire la guerre aux Anglois, & secourut encores plusieurs Princes ses alliez, comme les Roys de Castille & d'Escosse. Et mourat, laissa vneaussi grade somme de deniers en ses coffres, qu'il s'en fut encores point veu en France. Et estoient toutesfois les subsides qu'il leuoit sur son peuple fort petits & moderez de son temps. Et encores ce bon Prince en mourat, faisoit conscience de quelques aydes & subsides, dont ses subjects auoient esté foulez, pour la necessité des affaires de la France. Et pria en ses dernieres parolles son sils, de soulager son peuple le plustost qu'il pourroit, par l'abolition des tailles. Et le principal sons de ses sinances, estoit l'espargne, & bonne administration.

Età la verité il semble qu'il y a deux choses qui espuisent les deniers communs, sans aucun prossit ou aduatage de la Republique. Le premier est les dons immenses & non considerez: & l'autre est la mauuaise administration & mesnage des sinaces. Vostre Majesté considerera, s'il luy plaist, si l'vn & l'autre ont point cosommé inutilement partie des deniers qui ont esté leuez

M ij

sur le peuple. Nous ne voulons pas tellement restraindre la liberalité des Princes, qu'il ne leur soit permis de donner à qui il leur plaist: estant cela l'une des premieres excelléces de leur grandeur & Majesté. Mais nous voulons bien dire que telles choses se doiuet faire auec moderation, & en sorte que le public n'en souffre point. Car si telles despenses sont faittes en temps que l'estat est troublé, que les finances y sont courtes, & que le peuple est travaillé de subsides : la chose est d'autant plus dangereuse & odieufe, pource qu'il faut accroistre les impolitions pour enrichir les particuliers. Et le fisc, ou les finances publiques, come disoit l'Empereur Adria, est comme la ratelle en nostre corps, laquelle plus elle est grosse & enflee, & plus le reste du corps deuient sec & ethic: ainsi quand le sisce s'augmente

pour enrichir les particuliers, il fault que le comun s'en resente & s'apauurisse. Et certes en cela on ne pourroit nier, que depuis quelque temps les dons immenses n'ayent passé toutes les bornes & limites, eu esgard aux finances de France. Et nous recognoissons toutesfois cela estre aduenu par la misere du téps, où il sembloit estre dangereux de refuser aux importuns qui eussent peu, prenant autre party, faire beaucoup de mal & de dommage. Et souuentesfois, pour obuier à telles choses, a esté ordoné aux Republiques, que tels dons immenses se- sueton. in roiet reuoquez, ou pour le moins mo- Galba. derez. Ces choses ne seroient pas dictes pour donner loy à vostre liberalité, pour l'asseurance que vostre peuple se done de vostre sagesse, prudence & discretion, qui sçaura mesurer sa beneficence selon ses moyens &

necessitez, & clorre par cy apres plus libremét la bouche à tels importuns & indiscrets demandeurs. Comme nous esperons encores qu'elle sçaura tresbien remedier au mauuais mesnage, que la calamité & necessité a introduit en l'administration de ses sinances, que nous pensons proceder de deux causes principalement.

La premiere est la multitude des officiers des finances, le nombre desquels est creu si desmesurémet & extraordinairement, que leurs gages, despenses, fraiz & vacations, absorbent & consomment préside la moitié des finaces de France: de sorte qu'il se trouve telles provinces, d'où l'escu apporté en vostre espargne, ne reuiet pas à tréte sols. Du teps du Roy Charles v 1. les estats firent vne grande remonstrance & doleance, de ce qu'il y auoit cinq tresoriers, & qu'ancien-

111 111

nement il n'y en souloit auoir que deux. Et que diroient maintenant ces bonnes gens de ce temps là, de ceste formiliere de tant de financiers inutiles, si en lieu qu'il n'y souloit auoir qu'vn recepueur general ils en veoyét plus de quarante, comme ils sont auiourd'huy? Et pour vn tresorier de France, President de la chambre des Comptes de Paris, auec quatre maistres qui estoient prins des anciens maistres d'hostel du Roy, & six clercs, que lon a depuis appellez Auditeurs, ils voyent pres de deux cens officiers en ceste chambre, oultre six autres qui sont erigez aux autres Parlemens. De sorte que lon peult dire asseurément que les gages des officiers de finance de France, se montent plus que ne faisoient anciennement tous les reuenus, subsides, & impositions qui se leuoient ordinaire-

menten tout le Royaume. Et pource sembleroit bien que la supression de tous ces estats faicts nouvellement en si grand nombre, & qui sont vn fardeau inutile au peuple, aprés que les comptables auroient rendu compte, seroit vne des plus necessaires ordonnances que pourroit attendre ce Royaume, & qui apporteroit autant de soulagement à vostre peuple, & d'acquittement à vos debtes. Et ne sont receuables en leurs remonstrances ceulx, qui disent que ceste supression seroit vne diminutio des parties casuelles: car ceste comodité de toucher quelque peu de deniers coptans parhazard, s'achepte auec de grans & dommageables interests, tant pour la France que pour vos finances.

L'autre cause du mauuais mesnage, vient encores de la necessité : ayant esté vostre Majesté cotrainte de pren-

dre

dre & emprunter les deniers à grans & excessifs interests, & faire des parties desraisonnables auec quelques estrangiers & autres de vostre Royaume, qui se seruans de l'extremité en laquelle vous estes reduit, on fait entrer en leurs contracts plusieurs dons, gages, pensions, & autres parties non valables, que bien souuét ils acheptoiét à grand marché, & les mettent en copte de leur iuste valeur. De façon que le gain qu'ils y ont fait auec les interests, emporte & mage plus de la moitié des impositions nouvelles, qui se leuent sur vos subiects. Et s'il aduenoit, ce que Dieu ne vueille, que telle maniere de gens eussent intelligence auec aucuns de ceulx quise messét de vos affaires: la chose seroit reduitte à tresmalheureux & mauuais termes. Car ils ne vouldroient iamais veoir vostre estat desengagé, puis que

vostre pauureté seroit leur richesse. De celaie ne diray autre chose, sinon que pour semblables vsures manifestes du téps du Roy Loys x 1. & Philippes le Bel, les biés de telles personnes furent publiquement confisquez. Et depuis en l'an 1347. leur faisant leurs procés, il fut verifié, q pour deux cens quarante milliures de principal, ils auoient tiré de proussit & interests plus de vingt millios en bien peu d'an nées. Et no ne faisons point de doubte, que si telles choses estoient recherchées auiourd'huy aussi curieusemet qu'elles furent lors, qu'il ne se trouuassent des sommes d'vsures bien immoderées, qui sont d'autant plus dangereuses & dignes de punition, qu'en ces vsures là les particuliers y estoient seulemer endommagez, & icy le public y est interessé. Cela nous a semblé digne d'estre dict generalement

pour les finances de France, qui meriteroient vne recherche plus curieuse, & qui sera plus comodémet apposee au cayer de nos remonstrances.

Pour faire fin, nous toucherons vn mot de ce qui appartient à l'ordre & estat Ecclesiastique. En toutes les Republiques bié instituees, ceux qui ont eu la charge des choses sainctes & sacrees, ont esté tenus tousiours immunes de toutes charges publiques, tant réelles q personnelles. Et si ie voulois comencer par l'auctorité que les anciens Gaulois attribuent aux Druides, & cotinuer la recherche de toutes les autres Republiques anciennes, qui ont honoré come Roys leurs Sacrificateurs & maistres de leur religion & ceremonies, lon me pourroit accuser d'estre trop curieux, & paraduenture trop affectionné en ma cause. Mais ramenant les choses qui apartiennent

Nij

à nostre religion seulement, ie diray que dés le commencemet que l'Empire a esté publiquement Chrestien, soubs la faueur de ce catholique Prince Constătin, les biens qui estoient ja sequestrez pour le seruice de Dieu & entretenement de sa religion, furent declairez exempts de toutes charges & princes & publiques. Et ceste loy commencee dés le restablissement a tousiours duré ferme & inuiolable, come il se peult veoir par les loix Imperiales. Et si les Empereurs Chrestiens ont acquis vne grande loüange par telles immunitez donnees à l'Eglise de Dieu: les Roys de Fráce pour les auoir maintenues, se sont rendus hereditaires du nom & tiltre de treschrestien, qui leur fut concedé du temps de Charlemaigne, qui defendit si courageusement l'Eglise contre les Lombards, qui occupoient les

biens qui auoient esté consacrez à Dieu & à son Eglise. Et si nous recher chons toutes les histoires chrestiennes, nous trouuerrons que, plus que nuls autres, les Roys de Frace ont esté scrupuleux, & du tout religieux en la coseruation des priuileges & auctoritez de l'Eglise: & ont tousiours craint plus que nuls autres, de se seruir à leur vsage des choses sacrees & vouees à Dieu. Comme certainement par diuers exemples il a tousiours monstré, combien il auoit en horreur & detestation ceux qui ont mis les mains aux choses, qui par la pieté auoient esté reservees pour le service divin: & atousiours vsé à l'encontre d'eux d'vne iuste, manifeste & seuere vengeance. Dequoy les exemples sont assez vulgaires en l'escripture saincte, lesquels ie ne veulx reciter tous pour ne me rendre ennuyeux. Mais entre tels Niii

iugemens de Dieu, est memorable la defense miraculeuse qu'il fist contre Heliodorus qui auoit esté en uoyé par Seleucus Roy d'Asie, pour enleuer les choses plus precieuses consacrees à Dieu en son temple. Car estant là prest pour executer le commandemet qui luy auoit esté comis, il luy apparut vn homme plein de majesté, armé d'vnes armes dorees, & moté sur vn cheual bien enharnaché, lequel donna des deux pieds de deuant dessur la testede Heliodorus si grad coup, qu'estant jetté par terre, il fut saisi par deux ieunes hommes pleins d'vne venerable majesté, qui le foüeteret de sorte, qu'ils le miret tout en playes sanglantes, & le laisserent demy mort & esuanouy. Nous sommes contrains de ramener tels exemples pour respondre à quelques petits liurets & memoires imprimez, que quelques per-

sonnes mal affectez à l'Eglise, publiet & semet parceste Courr, par lesquels ils taschent de rejetter toute la foulle de vos affaires, & du desengaigement de vos debtes sur l'estat Ecclesiastique, conseillas de vendre leur domaine& reuenu téporel. Mais vostre Majesté sera, s'il luy plaist aduertie, que tels conseils procedet d'une maligne intérion, & sont semblables aux deliberatios de Iulian l'Apostat, cruel ennemy du nom de les vs CHRIST, qui ne trouuoit moyen plus propre pour ruiner la foy Chrestienne, que d'oster & rauir les biens qui estoient donnez à son Eglise. Mais la iuste punition que Dieu fist de luy, monstre assez combien son conseil estoit pernicieux. Et les exemples de la vengeance de Dieu sur les vsurpateurs des biens de l'Eglise ne manquent point encores en la loy de l'Euangile.

Car chacun sçait, que par la sentence du sainct Esprit pronocee par la bouche de sainct Pierre, Ananias & Saphi ra moururent soubdainement, pour auoir retenu vne partie des deniers prouenans de la vente de leur heritage, qu'ils auoient donné à l'Eglise. Et s'il ne leur estoit loisible de retenir ce qui estoit procedé de leur bien: il sem ble bien qu'il ne soit pas iuste de prédre ce que par autruy auoit esté donné & voue au seruice de Dieu & entretenement de son Eglise.

Celce Connestable du Roy Gontrand de Bourgongne, ayant sait son proussit des biens des Ecclesiastiques soubs l'authorité de son maistre, sentit auant que mourir en sa conscience vn iuste sleau qui l'assligeoit interieurement. Car estat vn iour en l'Eglise, il entendit lire ces mots du Prophete Esaie, Malheur sur ceux qui adioustét

mai-

maison auecques maison, possession sur possession. Et comme si ceste sentence luy eust donné vn coup de baston, il s'escria, malheureux que ie suis, ceste malediction tobe sur moy & sur toute ma race: & iamais depuis ne prouffita, ny ne fist bie, mais mourut malheureusemet. Ie n'ameneray point les exemples de Clouis 2. Roy de France, & du Comte de Mascon, recitez par nos histoires: mais ie ne puis passer soubs siléce celuy de Loys sixiesme, surnommé le Gros, lequel ayant esté, pendant le cours de sa vie, grand protecteur des priuileges de l'Eglise, pour certaine necessité sur ses vieux iours, se voulut ayder des biens des Ecclesiastiques, desquels il leur ostala possession. Mais ce grand personnage sain & Bernard, lumiere de sonsiecle, l'admonnesta par diuerses lettres de la faute qu'il faisoit, & puis

le vint luy-mesme trouuer. Et voyat que pour ces remonstrances il nes'en vouloit desister: le menaça fort rudemer, que bien tost il sentiroit sur luy le resmoignage de la vengeance de Dieu. Cequi aduint soudain apres, par la mort inopince de son fils aisné. Et si ce bon personnage viuoit auiourd'huy, de quels anathemes condemneroit & tels liures & leurs autheurs & moyens, qui conseillent de dilapider & védre tout le patrimoine de l'Eglise? Et pource que leur principale raison & argument de leur persuasion est la necessité de vos affaires & de l'estat : nous leur dirons que le Royaume de France s'est autresfois veu en plus grande necessité, mesmes pour les guerres intestines, estant la plus grand part de la France occupee par les rebelles & Anglois, qui tenoient entre autres la bonne ville de

Paris. Et toutesfois on ne parla iamais de dissiper & mettre en vente le bien & patrimoine de l'Eglise. Et iamais la necessité ne fut plus grande en autre Royaume qu'en Ægypte en ceste grade famine, qui dura sept'ans soubs le Patriarche Ioseph, pour subuenir à laquelle il fallut vendre la cinquiesme partie de tous les bies d'Ægypte, sauf toutesfois l'heritage des Prestres, ausquels Ioseph ne permit de toucher, mais les laissa immunes, comme nous lisons au Genese.

Nous ne voulons pas dire que l'Eglise en telles necessitez ne doibue ayder au public, mais cela doibt estre moderément & par les voyes legitimes: comme aussi on a veu en France, les Ecclesiastiques plus que nuls autres, prompts à subueniraux necessitez publiques. Et encores que l'Eglise sente soubs vostre Regne,

ceste faueur de ne veoir plus son bien aliené, ce qu'elle se promet de vostre insigne pieté, si ne demeurera elle pas pourtant exempte de beaucoup de grades charges & miseres. Car si nous voulons representer au vif, les oppressions que par impositions extraordinaires & excessiues subsides elle a enduré, que la desolation qui a esté en icelle, & qui continue encores en diuers lieux de ce Royaume, d'où les Ecclesiastiques sont bannis & exilez, leurs biens occupez, leurs Eglises & maisons ruinees & demolies, & eulx exposezà la cruauté & rage des ennemis de Dieu & de vostre Majesté. Nous craindrions de rafreschir en ceste fin la memoire des maulx passez, & trop esmouuoir le cueur pitoyable de vostre Majesté, laquelle ne voulas attrister en ceste conclusion, nous dirons seulement, qu'oultre toutes les

calamitez que vostre Majesté sçait que l'Eglise supporte, elle n'est exempte d'autres grandes charges, comme de dix huict ces mille liures qu'elle paye pour l'acquit de vos debtes, & pour les necessitez publiques en l'hostel de ville de Paris, oultre cinquante millions dont elle a subuenu en la Republique en ces plus grands affaires. Et encores apres son naufrage où elle a perdu grande partie de ses biens, tout cé qu'elle pourra, qui sera certes bien petit, ne sera espargné au bien & vtilité publique, par moyes legitimes, raisonnables & approuuez.

L'Eglise donques, SIRE, sanglante de ses playes, malheureusemet deschiree, persecutee de toutes parts, se jette pour son resuge entre vos bras, vous demande ayde & confort, vous

coniure par le nom de Treschrestien que vous portez pour ceste cause, par le Baptesme que vous auez receu en icelle, par le serment que vous auez fait en vostre Sacre, de luy garder ses priuileges, & par ceste insigne pieté, de laquelle vous faittes profession & estes admirable à tout le monde, que vo° soyez son suport & sa defense.Et auec toute l'obeissace que vous pouuez attédre de vos treshubles & tresobeissans subjects, ils ne cesseront iamais de vous secourir des armes qui leur sont les plus propres, qui sont les prieres & oraisons: lesquelles ils feront incessamment à Dieu, qui benira & fauorisera, s'il luy plaist, toutes vos actions, pour vous rendre heureux, aimé, craint & redoubté en ce monde, & vous preparera ceste troisiesme & plus heureuse couronne que

vous attendez en l'autresiecle, apres ces deux qui enuironnent maintenant vostre teste.

Prononcée le Ieudy 17. iour de Ianuier 1577.

Extraict du privilege.

Par grace & privilege du Roy, il est permis à Pierre l'Huillier Libraire iuré en l'Université de Paris, d'imprimer ou faire imprimer, vendre & distribuer un liure intitulé Harengue prononcée à Bloys devant le Roy, par Mess. Pierre d'Epinac, Archevesque, Comte de Lyon, & c. Et dessenses à tous autres de quelque estat & qualité qu'ils soient, d'imprimer ou faire imprimer, vendre ne distribuer ledict liure iusques à deux ans, sur peine de confiscation desdicts liures & d'amende arbitraire, comme apert plus amplemét és lettres de privilege: données à Paris le viij. iour de Feurier, 1577. & de nostre regne le troissesme.

Par le Conseil,

SIGNE DANES.

